



POČELO SUĐENJE UHAPŠENIMA U AKCIJI "LIPSTICK"

Ceca i Kurtović od prostitucije zarađivali po 100 maraka na sat

Ukoliko se Melisa Šehović nagodi sa Tužilaštvom bit će saslušana kao svjedok, a tužilac Osmić najavio da postoje naznake da bi još neko od optuženih mogao sporazumno priznati krivnju

Čitanjem optužnice i uvodnim riječima optužbe i odbrane jučer je u Kantonalnom sudu u Sarajevu započelo suđenje za četvero optuženih i uhapšenih u akciji Lipstick, a kojima se, između ostalog na teret stavlja, navođenje na prostituciju, pranje novca, pokušaj silovanja, laka tjelesna povreda, te nedozvoljeno držanje i nošenje oružja i municije.

Policijac i prostitutka

Tužilac Senad Osmić pročitao je optužnicu kojom se optuženi Samir Kurtović tereti da je od 2004. pa do hapšenja u oktobru 2015. organizirao i rukovodio prostitucijom na području KS. U tom periodu seksualne usluge u njegovoj organizaciji pružalo je više od 28 djevojaka od kojih su, najmanje dvije bile maloljetne. Na taj način, prema optužnici, stekao je 1.793.000 KM. Dio zarađenog novca stavljao

je u legalne tokove, između ostalog, i tako što je ulagao u razvoj stada domaćih životinja, te tako „prao“ novac.

Kurtović se tereti i da je 29. decembra 2006. godine pokušao silovati tada 16-godišnju S.B., kojoj je nanio lakšu tjelesnu povredu, a u dva navrata je kod njega nađena i nelegalna bojeva municija.

Melisa Šehović, zvana Ceca, inače po zanimanju modna dizajnerica, optužena je da je u dogovoru s Kurtovićem pružala seksualne usluge, te zajedno sa njim organizirala druge djevojke radi pružanja seksualnih usluga na području Kantona Sarajevo. Cijena seksualnih usluga, prema optužnici je iznosila najmanje 200 KM, od čega je 100 Kurtović zadržavao za sebe.

- Kurtović i Šehović na taj način su zarađivali po 100 maraka za sat vremena pružanja usluga - naglasio je Osmić, te dodao da je Kurtović tako znao zaraditi i po 1.000 KM dnevno.

Nemanja Janković, policijac zaposlen u PU Ilidža, optužen je da, nakon što je saznao da se Kurtović bavi organiziranjem prostitucije, nije to prijavio nadležnim, nego je za sebe i svog prijatelja Bojana Furtulu naručio dvije djevojke, koje su potom koristili na Jahorini, te za to platili 350 maraka.

Omeru Nargaliću na teret se stavlja da je nabavio, držao i nosio oružje i municiju bez dozvole nadležnog organa.

Tužilac Osmić je kazao kako će navode optužbe potkrijepiti dokazima, među kojima su najvažniji presretnuti telefonski razgovori pribavljeni tokom posebnih istražnih radnji, saslušanjem većeg broja svjedoka, kako djevojaka koje su pružale seksualne usluge, tako i osobljem hotela i motela u kojima su se te usluge pružale, te više vještaka.

Ceca pregovara

Tužilac je kazao i da optužena Šehović pregovara o sklapanju sporazuma o priznanju

krivnje, te da će, ukoliko dođe do njegovog zaključenja i ona biti saslušana kao svjedok, te da postoje naznake i da bi još neko od optuženih mogao sporazumno priznati krivnju.

Braniteljica optuženog Kurtovića Indira Karahodžić kazala je da odbrana u potpunosti osporava optužnicu, kao i raspored optuženih u njoj, te krivična djela koja im se stavljaju na teret.

-Nije jasno šta oni rade svi u istoj optužnici. Tužilaštvo se koristilo određenim vezama među optuženima, a čak ni u optužnici nema pravne kvalifikacije djela u sklopu organizacije - kazala je Karahodžić i dodala da su navodi optužnice paušalni i proizvoljni.

Sutkinja Rozita Šimić nastavak suđenja je zakazala za 12. juli, kada će tužilac Osmić pozvati kao svjedoke dvije uposlenice hotela Imziti, gdje je, prema optužnici, Kurtović pokušao silovati maloljetnicu.

M. M.

Braniteljica optuženog Kurtovića Indira Karahodžić kazala je da odbrana u potpunosti osporava optužnicu, kao i raspored optuženih u njoj, te krivična djela koja im se stavljaju na teret



Sa privođenja Samira Kurtovića